

FIFA STATUT

PRAVILNIK O PRIMJENI STATUTA

STALNE ODREDBE KONGRESA

Izdanje: april 2016.

Prevod s engleskog:

Fudbalski savez Crne Gore

U svrhe primjene i tumačenja ovog Statuta, Pravilnika o primjeni Statuta i Stalnih odredaba Kongresa mjerodavna je isključivo verzija na engleskom jeziku (član 9.4 Statuta)

SADRŽAJ

Član		Strana
	Definicije	3
1-9	I. Opšte odredbe	5
10-20	II. Članstvo	8
21	III. Počasni predsjednik, počasni potpredsjednik i počasni član	13
22-23	IV. Konfederacije	14
24-48	V. Organizacija	16
25-32	A. Kongres	17
30-34	B. Savjet	23
35	C. Predsjednik	26
36-37	D. Generalni sekretarijat	27
38	E. Biro Savjeta	28
39 - 48	F. Stalne komisije	30
49	VI. Godišnja konferencija saveza članova	34
50-55	VII. Nezavisne komisije	35
56	VIII. Disciplinske mjere	40
57-59	IX. Arbitraža	41
60-61	X. Poštovanje odluka FIFA-e	43
62-66	XI. Finansije	44
67-68	XII. Prava u takmičenjima i događajima	46
69-73	XIII. Takmičenja	47
69	A. Završna takmičenja FIFA-e	47
70-73	B. Međunarodne utakmice i takmičenja	48
74-75	XIV. Završne odredbe	49
Pravilnik o primjeni Statuta		
1-2	I. Molba za prijem u članstvo FIFA-e	50
3-4	II. Agenti za ugovaranje utakmica i posrednici	51
5-8	III. Pravo nastupa za reprezentativne selekcije	52
9	IV. Sportski integritet	54
10	V. Pravila igre	55
11-13	VI. Sudije i pomoćne sudije	56
14-15	VII. Završne odredbe	57
Stalne odredbe Kongresa		
1-12	Stalne odredbe Kongresa	58

Definicije

Dolje navedeni termini označavaju sljedeće:

- 1 **FIFA:** „Fédération Internationale de Football Association“.
- 2 **Savez:** fudbalski savez, priznat kao takav od strane FIFA-e. Član je FIFA-e, osim ako se iz konteksta podrazumijeva drugačije značenje.
- 3 **Liga:** organizacija koja je podređena savezu.
- 4 **Britanski savezi:** četiri saveza Ujedinjenog Kraljevstva: Engleski fudbalski savez, Škotski fudbalski savez, Velški fudbalski savez i Irski fudbalski savez (Sjeverna Irska).
- 5 **IFAB:** Bord međunarodnog fudbalskog saveza (IFAB).
- 6 **Zemlja:** nezavisna država koju je priznala međunarodna zajednica.
- 7 **Konfederacija:** grupa saveza koju priznaje FIFA, koji pripadaju istom kontinentu (ili geografskoj regiji).
- 8 **Kongres:** vrhovno i zakonodavno tijelo FIFA-e.
- 9 **Savjet:** strateško i nadzorno tijelo FIFA-e.
- 10 **Biro Savjeta:** biro Savjeta kako je utvrđeno članom 38 ovog Statuta.
- 11 **Pravila igre:** pravila fudbalske igre koja izdaje IFAB u skladu s članom 7 ovog statuta.
- 12 **Savez član:** savez koji je Kongres primio u članstvo FIFA-e.
- 13 **Službeno lice:** bilo koji član odbora (uključujući članove Savjeta), član komisije, sudija i pomoćni sudija, trener, pomoćni trener i sve druge osobe odgovorne za stručna, medicinska i administrativna pitanja u FIFA-i, konfederaciji, savezu, ligi ili klubu kao i sve druge osobe koje su obvezne da postupaju u skladu sa Statutom FIFA-e (osim igrača i posrednika).
- 14 **Klub:** član saveza (koji je savez član FIFA-e) ili član lige koju je priznao savez, koji prijavljuje makar jednu ekipu za takmičenje.
- 15 **Igrač:** svaki fudbaler licenciran od strane saveza.
- 16 **Fudbalska igra:** igra koju kontroliše FIFA i koja je organizovana od strane FIFA-e, konfederacija i/ili saveza članova u skladu s Pravilima igre.
- 17 **Službeno takmičenje:** takmičenje za reprezentativne selekcije koje organizuje FIFA ili bilo koja konfederacija.
- 18 **Interesna strana:** osoba, subjekt ili organizacija koja nije savez član i/ili tijelo FIFA-e, ali koja ima interesa u aktivnostima FIFA-e, koje mogu uticati ili se na njih može utjecati postupcima FIFA-e, ciljevima i politikama, posebno klubovi, igrači, treneri i profesionalne lige.

NAPOMENA:

Pojmovi koji se odnose na fizička lica primjenjuju se na oba pola.
Svaki pojam u jednini primjenjuje se na množinu i obratno.

I. OPŠTE ODREDBE

1 Naziv i sjedište

1.

Fédération Internationale de Football Association (FIFA) je savez registrovan u Trgovinskom registru kantona Ciriha shodno članu 60 ff. Švajcarskog građanskog zakona.

2.

Sjedište FIFA-e nalazi se u Zurichu (Švajcarska) i može biti preseljeno u drugo mjesto samo rezolucijom Kongresa.

2 Ciljevi

Ciljevi FIFA-e su:

- a) stalno unapređenje fudbala i njegova globalna promocija u smislu njegovog ujedinjenja, obrazovnih, kulturnih i humanitarnih vrijednosti, posebno putem programa za mlade i razvojnih programa;
- b) organizacija vlastitih međunarodnih takmičenja;
- c) sastavljanje pravilnika i odredbi kojima se uređuju fudbalska i povezana pitanja i osigurava njihova primjena;
- d) kontrola svih vrsta fudbala unutar saveza preduzimanjem potrebnih mjera za sprječavanje kršenja Statuta, pravilnika ili odluka FIFA-e ili Pravila igre;
- e) nastojati osigurati da fudbal bude dostupan svima koji žele učestvovati, bez obzira na pol ili godine;
- f) promovisati razvoj ženskog fudbala i potpuno učestvovanje žena na svim nivoima fudbalskog upravljanja; i
- g) promovisati integritet, etiku i fer plej s ciljem sprečavanja svih metoda ili postupaka, kao što su korupcija, doping ili manipulacija utakmica, koji mogu ugroziti integritet utakmica, takmičenja, igrača, službenih lica i saveza članova, ili dovesti do zlouporabe fudbala unutar saveza.

3 Ljudska prava

FIFA je posvećena poštovanju svih međunarodno priznatih ljudskih prava i nastoji promovisati zaštitu tih prava.

4 Nediskriminacija, jednakost polova i borba protiv rasizma

Diskriminacija bilo koje vrste protiv zemlje, privatne osobe ili grupe ljudi na račun njihove rase, boje kože, etničkog, nacionalnog ili društvenog porijekla, pola, invaliditeta, jezika, vjere, političkog mišljenja ili bilo kojeg drugog mišljenja, imovinskog stanja, statusa po rođenju ili bilo kojeg drugog statusa, seksualne orijentacije ili bilo kojeg drugog razloga, strogo je zabranjena i kažnjava se suspenzijom ili isključenjem.

5 Promovisanje prijateljskih odnosa

1.

FIFA promiče prijateljske odnose:

- a) između saveza članova, konfederacija, klubova, službenih osoba i igrača; i
- b) u društvu radi ostvarenja humanitarnih ciljeva.

2.

FIFA obezbjeđuje potrebna institucionalna sredstva za rješavanje svakog spora koji može nastati između saveza članova, konfederacija, klubova, službenih lica i igrača.

6 Igrači

Savjet posebnim pravilnicima reguliše status igrača i odredbe u vezi njihovih transfera, kao i pitanja u vezi s time, naročito treniranja igrača u klubovima i zaštitu reprezentativnih selekcija.

7 Pravila igre

1.

Svaki savez član organizuje fudbalsku igru u skladu s Pravilima igre koje je izdao IFAB. Samo IFAB može utvrđivati i mijenjati Pravila igre.

2.

IFAB je savez u skladu sa švajcarskim zakonom, sa sjedištem u Zurichu (Švicarska). Članovi IFAB-a su FIFA i četiri britanska saveza.

3.

Organizacija, obaveze i odgovornosti IFAB-a sadržani su u statutu IFAB-a.

4.

Svaki savez član igra futsal u skladu s Pravilima igre za futsal koje izdaje Savjet.

5.

Svaki savez član organizuje fudbal na pijesku u skladu s Pravilima igre za fudbal na pijesku koje izdaje Savjet.

8 Ponašanje tijela, službenih lica i drugih

1.

U svom djelovanju sva tijela i službena lica moraju poštovati Statut, pravilnike, odluke i Etički kodeks FIFA-e.

2.

U izuzetnim okolnostima Savjet, u dogovoru s nadležnom konfederacijom, na određeno vremensko razdoblje može smijeniti s dužnosti izvršna tijela saveza članova i zamijeniti ih komisijom za normalizaciju.

3.

Svaka osoba i organizacija uključena u fudbal obavezna je poštovati statute i pravilnike FIFA- e kao i načela fer pleja.

9 Službeni jezici

1.

Službeni jezici FIFA-e su engleski, španski, francuski i njemački. Engleski je službeni jezik za zapisnike, službenu prepisku i objave.

2.

Savezi članovi su odgovorni za prevode na jezik(e) svoje zemlje.

3.

Engleski, španski, francuski, njemački, ruski, arapski i portugalski su službeni jezici Kongresa. Na ove jezike prevode kvalifikovani prevodioci. Delegati mogu govoriti na svom maternjem jeziku ako osiguraju kvalifikovanog prevodioca koji će obavljati prevod na jedan od službenih jezika Kongresa.

4.

Statut, Pravilnik o primjeni Statuta, Stalne odredbe Kongresa, odluke i objave FIFA-e objavljuju se na četiri službena jezika. Ako postoji neslaganje u tekstu, mjerodavna je verzija teksta na engleskom jeziku.

II. ČLANSTVO

10 Prijem, suspenzija i isključenje

Kongres odlučuje o prijemu, suspenziji ili isključenju člana isključivo na preporuku Savjeta.

11 Prijem

1.

Svaki savez koji je odgovoran za organizaciju i nadzor fudbala u svim njegovim oblicima u svojoj zemlji može postati član FIFA-e. Prema tome, preporučuje se da svi savezi članovi FIFA-e u svoje sopstvene strukture uključe sve interesne strane u fudbalu. Shodno stavu 5 i 6 ovog člana, u svakoj zemlji može biti priznat samo jedan savez član.

2.

Članstvo je dozvoljeno samo ako je savez već član konfederacije. Savjet može izdati pravilnik o postupku prijema.

3.

Svaki savez koji želi postati član FIFA-e upućuje pisanu molbu administraciji FIFA-e.

4.

Pravno važeći statut saveza prilaže se uz molbu za članstvo, a treba da sadrži sljedeće obvezne odredbe:

- a) da će se uvijek poštovati Statut, pravilnike i odluke FIFA-e i relevantne konfederacije;
- b) da će se poštovati važeća Pravila igre;
- c) da će se priznati Sportski arbitražni sud, kao što je to navedeno u ovom Statutu.

5.

Svaki od četiri britanska saveza priznat je kao zasebni savez član FIFA-e.

6.

Savez u regiji koja još nije stekla nezavisnost može, uz saglasnost saveza člana u zemlji od koje je zavisan, takođe podnijeti molbu za prijem u FIFA-u.

7.

Ovaj član ne utiče na status postojećih saveza članova.

12 Zahtjev i postupak podnošenja molbe

1.

Savjet će od Kongresa zahtijevati da primi ili da ne primi savez u članstvo. Savez može Kongresu navesti razloge zbog kojih podnosi svoju molbu za prijem u članstvo.

Novi savez član stiče svoja članska prava i obveze čim bude primljen u članstvo. Njegovi delegati stiču pravo glasa i pravo da budu birani uz trenutno dejstvo.

13 Prava saveza članova

1. Savezi članovi imaju sljedeća prava:

- a) da učestvuju na Kongresu;
- b) da iznose predloge za dnevni red Kongresa;
- c) da imenuju kandidate za predsjednika FIFA-e i za Savjet;
- d) da učestvuju i glasaju na svim izborima FIFA-e, u skladu s FIFA-inim Pravilnikom o upravljanju;
- e) da učestvuju u takmičenjima koje organizuju FIFA;
- f) da učestvuju u FIFA-inim programima pomoći i razvoja; i
- g) da koriste sva ostala prava iz ovog Statuta i drugih pravilnika.

2.

Korištenje ovih prava je predmet drugih odredbi ovog Statuta i primjenjivih pravilnika.

14 Obveze saveza članova

1. Savezi članovi imaju sljedeće obveze:

- a) da u svako vrijeme u cijelini poštuju Statut, pravilnike, direktive i odluke tijela FIFA-e, kao i odluke Sportskog arbitražnog suda (CAS) donesene po žalbama, shodno članu 57, stav 1 Statuta FIFA-e;
- b) da učestvuju u takmičenjima koje organizuje FIFA;
- c) da plaćaju svoju članarinu;
- d) da obezbijede da njihovi članovi poštuju Statut, pravilnike, direktive i odluke tijela FIFA-e;
- e) da sazivaju svoje najviše i zakonodavno tijelo u redovitim razdobljima, makar svake dvije godine;
- f) da ratifikuju statut koji je u skladu sa zahtjevima Standardnog Statuta FIFA-e;
- g) Da osnivaju Komisiju sudija koja je direktno podređena savezu članu;
- h) da poštuju Pravila igre;
- i) da obavljaju svoje poslove nezavisno i da obezbijede da na njihovo poslovanje ne utiče ni jedna treća strana u skladu s članom 19 ovog Statuta;
- j) da u potpunosti ispunjavaju sve druge dužnosti koje proizlaze iz ovog Statuta i drugih pravilnika.

2.

Kršenje pomenutih obveza može dovesti do izricanja kazni predviđenih ovim Statutom protiv saveza člana.

3.

Povrede stava 1(i) mogu takođe dovesti do kazni, čak i ukoliko do uticaja treće strane nije došlo zbog greške odnosnog saveza člana. Svaki savez član odgovoran je prema FIFA-i za bilo koje i sve postupke članova njihovih tijela uzrokovane teškim propustima ili svjesnim nedoličnim ponašanjem takvih članova.

15 Statuti saveza članova

Statuti saveza članova moraju biti u skladu sa načelima dobrog upravljanja i posebno treba da sadrže, minimalno, odredbe u vezi sljedećih pitanja:

- a) neutralnost u političkim i vjerskim pitanjima;
- b) zabrana svih oblika diskriminacije;
- c) nezavisnost i izbjegavanje bilo kojeg oblika političkog uplitanja;
- d) da osiguraju da su pravna tijela nezavisna (odvajanje ovlašćenja);
- e) sve relevantne interesne strane moraju se saglasiti da će poštovati Pravila igre, načela lojalnosti, integriteta, sportskog ponašanja i fer pleja, kao i statut, pravilnike/propozicije i odluke FIFA-e i odnosne konfederacije;
- f) svi relevantni interesne strane moraju se saglasiti da će priznati nadležnost i ovlašćenja CAS-a i dati prioritet arbitraži kao načinu za rješavanje sporova;
- g) da će savez član imati primarnu odgovornost za regulisanje pitanja u vezi suđenja, borbe protiv dopinga, registracije igrača, licenciranja klubova, izricanja disciplinskih mjera, uključujući mjere za etički neprimjereno ponašanje te mjera potrebnih za zaštitu integriteta takmičenja;
- h) definicija nadležnosti tijela koja donose odluke;
- i) izbjegavanje sukoba interesa u donošenju odluka;
- j) zakonodavna tijela moraju biti konstituisana u skladu s načelima predstavničke demokratije uzimajući u obzir važnost jednakosti polova u fudbalu; i
- k) godišnja nezavisna revizija računa.

16 Suspendizija

1.

Kongres može suspendovati savez član isključivo na zahtjev Savjeta. Međutim, Savjet može, bez glasanja Kongresa, privremeno suspendovati, uz trenutno dejstvo, savez koji ozbiljno krši svoje članske obveze. Suspendizija koju je odobrilo Savjet traje do sljedećeg Kongresa, osim ako je Savjet u međuvremenu ukine.

2.

Da bi Kongres suspendovao savez član potrebna je tročetvrtinska (3/4) većina prisutnih saveza s pravom glasa. Suspendizija saveza člana od strane Kongresa ili Savjeta potvrđuje se na sljedećem Kongresu tročetvrtinskom većinom prisutnih saveza s pravom glasa. Ukoliko ne bude potvrđena, takva suspendizija se automatski ukida.

3.

Suspendovani savez član ne može koristiti ni jedno od svojih članskih prava. Ostali savezi članovi ne mogu održavati sportske kontakte sa suspendovanim savezom članom. Disciplinska komisija može izreći dodatne kazne.

4.

Članovi koji ne učestvuju na najmanje dva od svih takmičenja FIFA-e tokom razdoblja od četiri uzastopne godine gube pravo glasa na Kongresu sve dok ne ispune svoje obveze u tom smislu.

17 Isključenje

1.

Kongres može isključiti savez član samo na zahtjev Savjeta ako:

- a) propusti da ispunjava svoje finansijske obveze prema FIFA-i; ili
- b) ozbiljno krši Statut, pravilnike ili odluke FIFA-e; ili
- c) izgubi status saveza koji predstavlja fudbalsku igru u svojoj zemlji.

2.

Da bi isključenje saveza člana bilo valjano potrebno je da Kongresu prisustvuje apsolutna većina (više od 50%) saveza s pravom glasa, a predlog za isključenje mora biti usvojen tročetvrtinskom (3/4) većinom valjanih glasova.

18 Istupanje

1.

Savez član može istupiti iz FIFA-e i to na kraju kalendarske godine. Obavještenje o istupanju mora se dostaviti generalnom sekretarijatu najkasnije šest mjeseci prije završetka kalendarske godine i to preporučenom poštom.

2.

Istupanje nije valjano dok savez član koji želi istupiti ne ispuni svoje finansijske obveze prema FIFA-i i ostalim njenim savezima članovima.

19 Nezavisnost saveza članova i njihovih tijela

1.

Svaki savez član mora svoje poslove obavljati nezavisno i bez uticaja trećih strana.

2.

Tijela saveza člana moraju biti ili izabrana ili imenovana u tom Savezu. Statutom saveza člana mora biti utvrđen demokratski postupak koji garantuje potpunu nezavisnost izbora ili imenovanja.

3.

Svako tijelo saveza člana koje nije izabrano ili imenovano shodno odredbama stava 2, čak i na privremenoj osnovi, neće biti priznato od FIFA-e.

4.

Odluke koje su donijela tijela koja nijesu izabrana ili imenovana shodno stavu 2 neće biti priznate od FIFA-e.

20 Status klubova, liga i drugih grupa klubova

1.

Klubovi, lige ili bilo koje druge grupe pridružene savezu članu podređene su tom savezu članu i od njega priznate. Statutom saveza člana utvrđeni su opseg nadležnosti kao i prava i obaveze takvih grupa. Statut i pravilnike ovih grupa odobrava savez član.

2.

Svaki savez član obezbjeđuje da njegovi pridruženi klubovi mogu nezavisno od bilo kojeg spoljnog tijela donositi sve odluke o svim pitanjima u vezi članstva. Ova obaveza primjenjuje se bez obzira na korporacijsku strukturu pridruženog kluba. U svakom slučaju, savez član obezbjeđuje da ni fizička niti pravna osoba (uključujući dioničarska društva i podružnice), ne kontrolišu više od jednog kluba na bilo koji način (posebno putem većinskog dioničkog udjela, većinom prava glasa, većinom mjesta u upravnom odboru ili bilo kojim drugim oblikom ekonomske zavisnosti ili kontrole, itd.), uvijek kada bi mogao biti ugrožen integritet bilo koje utakmice ili takmičenja.

III. POČASNI PREDsjedNIK, POČASNI POTPREDSJEDNIK I POČASNI ČLAN

21 Počasni predsjednik, počasni potpredsjednik i počasni član

1.

Za posebne zasluge u fudbalu, Kongres može dodijeliti titulu počasnog predsjednika, počasnog potpredsjednika ili počasnog člana bilo kojem bivšem članu Savjeta.

2.

Savjet predlaže te kandidate.

3.

Počasni predsjednik, počasni potpredsjednik ili počasni član mogu učestvovati na Kongresu. Mogu učestvovati u raspravama, ali ne mogu glasati.

IV. KONFEDERACIJE

22 Konfederacije

1.

Savezi članovi koji pripadaju istom kontinentu formirali su sljedeće konfederacije koje je priznala FIFA:

- a) Confederación Sudamericana de Fútbol – CONMEBOL
- b) Asian Football Confederation - AFC
- c) Union des associations européennes de football - UEFA
- d) Confédération Africaine de Football – CAF
- e) Confederation of North, Central American and Caribbean Association Football – CONCACAF
- f) Oceania Football Confederation - OFC

Priznavanje svake konfederacije od strane FIFA-e podrazumijeva potpuno međusobno poštovanje međusobnih ovlaštenja unutar njihovih relevantnih institucionalnih područja nadležnosti, kako je utvrđeno ovim Statutom.

2.

U izuzetnim okolnostima, FIFA može ovlastiti konfederaciju da dodijeli članstvo savezu koji geografski pripada drugom kontinentu i nije pridružen konfederaciji tog kontinenta. Potrebno je pribaviti mišljenje odnosne konfederacije kojoj on geografski pripada.

3.

Svaka konfederacija ima sljedeća prava i obveze:

- a) da poštuje i osigura poštovanje Statuta, pravilnika i odluka FIFA-e;
- b) da blisko surađuje s FIFA-om na svim područjima, kako bi se ostvarili ciljevi iz člana 2 i organizovala međunarodna takmičenja;
- c) da organizuje svoja međuklupska takmičenja, u skladu s međunarodnim kalendarom utakmica;
- d) da organizuje sva svoja međunarodna takmičenja u skladu s međunarodnim kalendarom utakmica;
- e) da obezbijedi da međunarodne lige ili bilo kakve druge takve grupe klubova ili liga ne budu formirane bez njene saglasnosti i odobrenja FIFA-e;
- f) da, na zahtjev FIFA-e, dodijeli status privremenog člana savezima koji su podnijeli molbu za članstvo u FIFA-i. Ovaj status daje savezima pravo učestvovanja u takmičenjima i konferencijama konfederacije.
- a) Sva druga prava i obveze privremenog člana regulisane su statutom i pravilnicima konfederacije. Privremeni članovi ne mogu učestvovati na završnim takmičenjima FIFA-e.
- g) da aktivno i konstruktivno održava odnose i saradnju s FIFA-om za dobrobit igre putem savjetodavnih sjednica i raspravlja i rješava sve probleme koji su od interesa konfederacija i FIFA-e;
- h) da osigura da predstavnici imenovani u tijela FIFA-e ili izabrani u Savjet svoje dužnosti u ovim tijelima obavljaju s međusobnim poštovanjem, solidarnošću, uvažavanjem i u

skladu s fer plejom, kao i u skladu s ovim Statutom i svim pripadajućim pravilnicima koje izdaje FIFA;

- i) da osniva komisije koje usko sarađuju s odgovarajućim komisijama FIFA-e;
- j) da, u izuzetnim okolnostima, uz saglasnost FIFA-e, dozvoli savezu iz druge konfederacije (ili klubovima tog saveza), da učestvuju u takmičenju koje ona organizuje;
- k) da u saradnji s FIFA-om preuzima sve mjere koje smatra neophodnima za razvoj fudbalne igre na odnosnom kontinentu, kao što je organizovanje razvojnih programa, kurseva, konferencija itd.;
- l) da osniva tijela potrebna za obavljanje preuzetih dužnosti; i
- m) da obezbijedi sredstva potrebna za obavljanje svojih dužnosti.

4.

Savjet može jednoj ili više (ili svim) konfederacijama dodijeliti druge dužnosti ili nadležnosti u dogovoru s tim konfederacijama ili konfederacijom.

5.

Statuti i pravilnici konfederacija, koji se revidiraju s vremena na vrijeme, dostavljaju se FIFA-i na odobrenje.

23 Statuti Konfederacija

Statuti Konfederacija moraju biti u skladu sa principima dobrog upravljanja i posebno sadržati, kao minimum, odredbe koje se odnose na sljedeća pitanja:

- a) neutralnost u političkim i vjerskim pitanjima;
- b) zabranu svih oblika diskriminacije;
- c) nezavisnost i izbjegavanje bilo kojeg oblika političkog uplitanja;
- d) obezbijediti da su pravna tijela nezavisna (odvajanje ovlašćenja);
- e) svi relevantne interesne strane moraju se saglasiti sa poštovanjem Pravila igre, načela lojalnosti, integriteta, sportskog ponašanja i fer pleja, kao i statuta, pravilnika/propozicija i odluka FIFA-e i odnosnih konfederacija;
- f) sve relevantne interesne strane moraju biti saglasne sa priznanjem nadležnost i ovlašćenja CAS-a i dati prioritet arbitraži kao načinu za rješavanje sporova;
- g) regulisanje pitanja u vezi suđenja, borbe protiv dopinga, licenciranja klubova, izricanja disciplinskih mjera, uključujući mjere za etički neprimjereno ponašanje kao i mjere potrebne za zaštitu integriteta takmičenja;
- h) definisanje nadležnosti tijela koja donose odluke;
- i) izbjegavanje sukoba interesa u donošenju odluka;
- j) zakonodavna tijela moraju biti konstituisana u skladu s načelima predstavničke demokratije i uzimati u obzir važnost jednakosti polova u fudbalu; i
- k) godišnja nezavisna revizija računa.

V. ORGANIZACIJA

24 Tijela

1.

Kongres je vrhovno i zakonodavno tijelo FIFA-e.

2.

Savjet je strateško i nadzorno tijelo.

3.

Generalni sekretarijat je izvršno, operativno i administrativno tijelo.

4.

Stalne i ad hoc komisije savjetuju i pomažu Savjetu i generalnom sekretarijatu u obavljanju njihovih dužnosti. Njihove osnovne dužnosti utvrđene su ovim Statutom, a njihov sastav, funkcije i dodatne dužnosti utvrđene su u FIFA-inom Pravilniku o upravljanju.

5.

Nezavisne komisije izvršavaju svoje obveze u skladu s ovim Statutom i primjenjivim pravilnicima FIFA-e.

6.

Nezavisni revizori obavljaju sve revizije računa i finansijskih izvještaja FIFA-e kako je propisano švajcarskim zakonodavstvom.

A. Kongres

25 Kongres

1.

Kongres može biti Redovni kongres ili Vanredni kongres.

2.

Redovni kongres održava se svake godine. Savjet utvrđuje mjesto i datum. Nacionalni savezi se pisanim putem obavještavaju o mjestu i datumu takvog Redovnog kongresa najmanje tri mjeseca prije njegovog održavanja. Formalni poziv upućuje se u pisanoj formi najmanje mjesec dana prije datuma Kongresa. Ovaj poziv sadrži dnevni red, izvještaj Predsjednika, finansijski izvještaj, uključujući konsolidovani finansijski izvještaj i izvještaj revizora.

3.

Savjet može u svako doba sazvati Vanredni kongres.

4.

Savjet saziva Vanredni kongres ako takav zahtjev u pisanoj formi podnese jedna petina (1/5) saveza članova. Zahtjev mora sadržati tačke dnevnog reda. Vanredni kongres održava se u roku od tri mjeseca od prijema takvog zahtjeva.

5.

Savezi članovi se obavještavaju o mjestu, datumu i dnevnom redu najmanje dva mjeseca prije datuma Vanrednog kongresa. Dnevni red Vanrednog kongresa ne može se mijenjati.

26 Glasanje, delegati, posmatrači

1.

Svaki član ima jedan glas na Kongresu, a zastupaju ga njegovi delegati. Samo prisutni savezi imaju pravo glasa. Glasanje putem punomoćja ili pisma nije dozvoljeno.

2.

Delegati moraju pripadati savezu članu kojeg zastupaju i moraju biti imenovani od strane odgovarajućeg tijela tog saveza.

3.

Delegati konfederacije mogu učestvovati na Kongresu kao posmatrači, bez prava glasa.

4.

Tokom svog mandata, članovi Savjeta ne mogu biti imenovani kao delegati svojih saveza.

5.

Predsjednik vodi Kongres shodno Stalnim odredbama Kongresa.

27 Kandidati za predsjednika FIFA-e, za Savjet, za predsjedavajuće, zamjenike predsjedavajućih i članove Komisije za reviziju i usklađenost i sudskih tijela

1.

Samo savezi članovi mogu predlagati kandidate za funkciju predsjednika FIFA-e. Kandidatura za predsjednika FIFA-e valjana je samo ako je podržalo ukupno najmanje pet saveza članova. Savezi u pisanom obliku moraju obavijestiti generalni sekretarijat FIFA-e o imenu kandidata za predsjednika FIFA-e i to najmanje četiri mjeseca prije datuma Kongresa i priložiti izjave o podršci najmanje pet saveza. Kandidat za predsjednika FIFA-e treba da je imao aktivnu ulogu u fudbalu (npr. kao igrač ili službeno lice u FIFA-i, konfederaciji ili savezu itd.), tokom dvije od posljednjih pet godina prije nego ga je predložen za kandidata i mora proći provjeru ispunjavanja uslova koju obavlja Komisija za provjeru ispunjavanja uslova shodno FIFA-inom Pravilniku o upravljanju.

2.

Generalni sekretarijat obavještava saveze članove o imenima predloženih kandidata za predsjednika FIFA-e najmanje mjesec dana prije datuma Kongresa.

3.

Shodno donjem stavu 4, samo savezi članovi mogu predlagati kandidate za Savjet. Savezi članovi moraju pisanim putem obavijestiti generalni sekretarijat FIFA-e o kandidaturi za Savjet najmanje četiri mjeseca prije početka kongresa odnosno konfederacije na kojem će se održati navedeni izbori. Svaki savez član ima pravo podnijeti samo jedan predlog za člana Savjeta. Ukoliko savez član dostavi predloge za više od jednog kandidata, svi njegovi dostavljeni predlozi smatraju se nevaljanima. Savez član može predložiti samo kandidate iz svoje konfederacije.

Izbori kandidatkinja za Savjet od strane saveza članova (najmanje jedna po konfederaciji), utvrđeni su članom 33, stavom 5 ovog Statuta.

5.

Članove Savjeta biraju savezi članovi na kongresima svojih konfederacija, u skladu s FIFA- inim Pravilnikom o upravljanju. Kandidati za Savjet moraju proći provjeru ispunjavanja uslova koju obavlja za to nadležna komisija u skladu s FIFA-inim Pravilnikom o upravljanju. Izbor članova Savjeta nadzire FIFA.

6.

Uslovi koje je potrebno ispunjavati tokom kandidature za Predsjednika i za funkcije u Savjetu utvrđeni su u FIFA-inom Pravilniku o upravljanju.

7.

Savjet Kongresu podnosi predloge za mandate predsjedavajućih, zamjenika predsjedavajućih i članova Komisije za reviziju i usklađenost, Komisije za upravljanje i pravnih tijela. Savjet unaprijed određuje broj mjesta koja se dodjeljuju svakoj konfederaciji u relevantnoj komisiji. Predlozi se podnose pisanim putem generalnom sekretarijatu najmanje četiri mjeseca prije početka Kongresa. Postupak je opisan u FIFA-inom Pravilniku o upravljanju.

8.

Kandidati za funkcije predsjedavajućih, zamjenika predsjedavajućih i članove Komisije za reviziju i usklađenost i pravnih tijela moraju proći provjeru ispunjavanja uslova koju obavlja za to nadležna komisija u skladu s FIFA-inim Pravilnikom o upravljanju.

28 Dnevni red Redovnog kongresa

1.

Generalni sekretar priprema nacrt dnevnog reda na osnovu predloga Savjeta i saveza članova. Svaki predlog koji savez član želi dostaviti Kongresu dostavlja se u pisanom obliku generalnom sekretarijatu, uz kratko objašnjenje, najmanje dva mjeseca prije datuma Kongresa.

2.

Dnevni red Kongresa obvezno sadrži sljedeće tačke:

- a) izjava da je Kongres sazvan i sastavljen shodno Statutu;
- b) usvajanje dnevnog reda;
- c) obraćanje Predsjednika;
- d) imenovanje pet saveza članova za ovjeru zapisnika;
- e) imenovanje brojača glasova;
- f) suspenzija ili isključenje saveza člana (ako je primjenjivo);
- g) usvajanje zapisnika s prethodnog kongresa;
- h) izvještaj o radu (aktivnosti od održavanja posljednjeg Kongresa);
- i) izvještaj Komisije za reviziju i usklađenost;
- j) prezentacija godišnjih revidiranih finansijskih izvještaja, uključujući konsolidovane finansijske izvještaje i godišnji izvještaj kao i izvještaj revizora;
- k) usvajanje godišnjih revidiranih finansijskih izvještaja, uključujući konsolidovane finansijske izvještaje i godišnji izvještaj kao i izvještaj revizora;
- l) usvajanje budžeta;
- m) primanje u članstvo (ako je primjenjivo);
- n) glasanje o predlozima za usvajanje i izmjene Statuta, Pravilnika o primjeni Statuta i Stalnih odredaba Kongresa (ako je primjenjivo);
- o) rasprava o predlozima koji su pravovremeno dostavili savezi članovi i Savjet u roku propisanom u stavu 1 (ako je primjenjivo);
- p) imenovanje revizora (ako je primjenjivo);
- q) izbor ili razrješenje Predsjednika u skladu s ovim Statutom (ako je primjenjivo);
- r) izbor ili razrješenje predsjedavajućih, zamjenika predsjedavajućih i članova sljedećih komisija (ako je primjenjivo), na predlog Savjeta:
 - Disciplinska komisija
 - Etička komisija
 - Komisija za žalbe
 - Komisija za reviziju i usklađenost

- Komisija za upravljanje
- s) Glasanje o imenovanju zemlje domaćina završnog takmičenja FIFA Svjetskog prvenstva (ako je primjenjivo).

3.

Dnevni red Redovnog kongresa može se izmijeniti pod uslovom da se s takvim predlogom saglasi tri četvrtine (3/4) prisutnih saveza na Kongresu s pravom glasa.

29 Usvajanje izmjena i dopuna Statuta, Pravilnika o primjeni Statuta i Stalnih odredbi Kongresa

1.

Kongres je nadležan za izmjene i dopune Statuta, Pravilnika o primjeni Statuta i Stalnih odredbi Kongresa.

2.

Sve predloge za izmjene i dopune Statuta savez član ili Savjet mora dostaviti generalnom sekretarijatu u pisanom obliku i uz kratko objašnjenje. Predlog koji dostavi savez član valjan je ako su ga u pisanom obliku podržala još najmanje dva druga saveza člana.

3.

Da bi glasanje o izmjenama i dopunama Statuta bilo valjano, mora ga podržati apsolutna većina saveza članova (više od 50%) s pravom glasa.

4.

Predlog za usvajanje ili izmjenu i dopunu Statuta usvojen je ako se s njim saglasilo tri četvrtine (3/4) prisutnih saveza članova s pravom glasa.

5.

Predlog za usvajanje ili izmjene i dopune Pravilnika o primjeni Statuta i Stalnih odredbi Kongresa, savez član ili Savjet mora dostaviti generalnom sekretarijatu u pisanom obliku i uz kratko objašnjenje.

6.

Kako bi bilo koji predlog za usvajanje ili izmjene i dopune Pravilnika o primjeni Statuta i Stalnih odredaba Kongresa bio usvojen, potrebna je prosta većina (više od 50%) valjanih glasova.

30 Izbori, druge odluke, potrebna većina

1.

Izbori se sprovode tajnim glasanjem.

2.

Svaka druga odluka za čije je donošenje potrebno glasanje donose se dizanjem ruku ili elektronskim glasanjem. Ako dizanjem ruku nije dobivena jasna većina glasova za odnosni predlog, glasanje se obavlja prozivkom, pri čemu se savezi prozivaju prema engleskom abecednom redu.

3.

Za izbor Predsjednika, u slučaju kada postoje dva ili manje kandidata, potrebna je prosta većina (više od 50%) valjanih glasova. Ukoliko postoje više od dva kandidata za izbor Predsjednika, potrebno je dvije trećine (2/3) glasova prisutnih saveza s pravom glasa u prvom krugu. Od drugog kruga nadalje, onaj ko dobije najmanji broj glasova eliminiše se sve dok ne ostanu samo dva kandidata.

4.

Članove Savjeta biraju nacionalni savezi u skladu s članom 27, stavom 5 ovog Statuta.

5.

Predsjednik svake konfederacije postaje potpredsjednik Savjeta po službenoj dužnosti.

6.

Svaki potpredsjednik i svaki član Savjeta mora proći provjeru ispunjenja uslova za obavljanje dužnosti, koju sprovodi za to nadležna komisija shodno FIFA-inom Pravilniku o upravljanju.

7.

Za izbor predsjedavajućeg, zamjenika predsjedavajućeg i članova svakog pravnog tijela, Komisije za reviziju i usklađenost kao i Komisije za upravljanje, bira(biraju) se kandidat(i) koji dobije(u) najviše glasova u odnosu na upražnjena mjesta.

8.

Izbor predsjedavajućeg, zamjenika predsjedavajućeg i članova svakog pravnog tijela, Komisije za reviziju i usklađenost i Komisije za upravljanje, Kongres može sprovesti odjednom. Međutim, na zahtjev najmanje deset članova za pojedinog kandidata, može se sprovesti zasebno glasanje.

9.

Osim ako je Statutom drugačije propisano, prosta većina (više od 50%) valjanih glasova dovoljna je da bi izbori, glasanja i druge odluke bili valjani.

10.

Dodatni detalji propisani su Stalnim odredbama Kongresa.

31 Zapisnik

1.

Generalni sekretar odgovoran je za vođenje zapisnika Kongresa.

2.

Zapisnik Kongresa provjeravaju za to imenovani savezi članovi.

32 Datumi stupanja odluka na snagu

Odluke Kongresa za saveze članove stupaju na snagu šezdeset (60) dana po završetku Kongresa, osim ukoliko Kongres za stupanje na snagu odluke odredi drugi datum.

B. Savjet

33 Sastav, izbor Predsjednika, potpredsjednika i članova Savjeta

1.

Shodno članu 75 ovog Statuta (prelazne odredbe), Savjet se sastoji od 37 članova: 1 Predsjednik, kojeg bira Kongres, 8 potpredsjednika, i 28 drugih članova

Po izboru na dužnost, svaki član Savjeta obavezuje se i prihvata odgovornost da djeluje predano, lojalno i nezavisno u najboljem interesu FIFA-e i promovisanja i razvoja fudbala na globalnom nivou.

2.

Predsjednika bira Kongres na period od četiri godine u godini koja slijedi nakon FIFA Svjetskog prvenstva. Njegov mandat počinje po završetku Kongresa na kojem je izabran. Niko ne može biti izabran na dužnost predsjednika u periodu dužem od tri mandata (bez obzira radi li se o uzastopnim mandatima). Prethodni mandati na poziciji potpredsjednika ili člana Savjeta ne uzimaju se u obzir kod utvrđivanja ograničenja broja mandata Predsjednika.

3.

Članove Savjeta biraju savezi članovi prilikom kongresa odnosno konfederacije na mandat od četiri godine. Njihov mandat počinje nakon završetka kongresa na kojem su izabrani. Član Savjeta ne može biti na dužnosti u periodu dužem od tri mandata (bez obzira radi li se o uzastopnim mandatima).

4.

a)	CONMEBOL	potpredsjednik (1)	članovi (4)
b)	AFC	potpredsjednik (1)	članovi (6)
c)	UEFA	dopredsjednici (3)	članovi (6)
d)	CAF	potpredsjednik (1)	članovi (6)
e)	CONCACAF	potpredsjednik (1)	članovi (4)
f)	OFC	potpredsjednik (1)	članovi (2)

Konfederacijama su dodijeljena sljedeća mjesta u Savjetu:

5.

Članovi svake konfederacije moraju obezbijediti da izaberu najmanje jednu članicu Savjeta. U slučaju da članovi konfederacije ne izaberu niti jednu kandidatkinju za Savjet, mjesto rezervisano za članicu takve konfederacije smatraće se izgubljenim od strane svih članova te konfederacije i ostaće upražnjeno do sljedećeg izbora članova Savjeta.

6.

Najviše jedan predstavnik iz istog saveza člana može istovremeno biti član Savjeta.

Ako je Predsjednik trajno ili privremeno spriječen da obavlja svoju službenu funkciju, do sljedećeg Kongresa ovlašćenja i odgovornosti Predsjednika preuzima potpredsjednik s najdužim stažom. Ako bude potrebno, taj će Kongres izabrati novog Predsjednika. Ako je potpredsjednik s najdužim stažom

spriječen da preuzme ovlašćenja i odgovornosti Predsjednika, sljedeći potpredsjednik s najdužim stažom preuzima ovlašćenja i odgovornosti Predsjednika.

8.

Bilo koji potpredsjednik ili drugi član Savjeta koji je trajno ili privremeno spriječen da obavlja svoju službenu funkciju, biće zamijenjen članovima relevantne konfederacije koja je izabrala tog potpredsjednika ili člana tokom preostalog trajanja mandata.

34 Nadležnosti Savjeta

1.

Savjet utvrđuje misiju, strateški smjer, politiku i vrijednosti FIFA-e, konkretno u vezi organizacije i razvoja fudbala na svjetsko nivou i svih povezanih pitanja.

2.

Što se tiče pitanja vezanih uz poslovanje ili finansije, Savjet, između ostalog, utvrđuje:

- standarde, politiku i postupke koji se primjenjuju na dodjeljivanje komercijalnih ugovora FIFA-e;
- standarde, politiku i postupke koji se primjenjuju na subvencije za fudbalski razvoj;
- standarde, politiku i postupke u vezi operativnih troškova FIFA-e; i
- standarde, politiku i postupke u vezi svih drugih pitanja koja se odnose na poslovanje ili finansije FIFA-e.

Savjet delegira izvršenje i upravljanje poslovanjem ili pitanjima u vezi finansija generalnom sekretarijatu, koji djeluje pod nadležnošću i nadzorom Savjeta kojem je odgovoran.

3.

Savjet nadzire sveukupno upravljanje FIFA-om od strane generalnog sekretarijata.

4.

Savjet odobrava budžet i godišnje revidirane finansijske izvještaje, uključujući konsolidovane finansijske izvještaje, koje priprema Finansijska komisija i godišnji izvještaj koji se dostavlja Kongresu na odobrenje.

5.

Savjet imenuje predsjedavajućeg, zamjenika predsjedavajućeg i članove stalnih komisija osim onih koje je izabrao Kongres, u skladu s ovim Statutom.

6.

Savjet radi izbora Kongresu predlaže predsjedavajućeg, zamjenika predsjedavajućeg i članove Disciplinske komisije, Etičke komisije, Komisije za žalbe, Komisije za reviziju i usklađenost i Komisije za upravljanje.

7.

Savjet može odlučiti da osnuje ad-hoc komisije ukoliko je neophodno u bilo koje vrijeme.

8.

Savjet imenuje tri predstavnika FIFA-e koji uz predsjednika FIFA-e učestvuju na opštoj skupštini IFAB-a. Uz to, Savjet ima pravo da odluči kako će predstavnici FIFA-e glasati u IFAB-u.

9.

Na predlog Predsjednika, Savjet imenuje generalnog sekretara. Generalni sekretar može biti razriješen od strane Savjeta koje djeluje samostalno.

10.

Savjet odlučuje o mjestu i datumima završnih takmičenja FIFA-inih turnira i o broju ekipa - učesnica iz svake konfederacije. Ovo se ne odnosi na odluke o zemlji domaćinu završnog takmičenja FIFA Svjetskog prvenstva, o čemu glasa Kongres.

11.

Savjet izdaje opšte pravilnike i, konkretno, FIFA-in Pravilnik o upravljanju.

12.

Savjet rješava sva pitanja u vezi FIFA-e koja ne spadaju u područje odgovornosti drugog tijela, u skladu s ovim Statutom.

13.

Ovlašćenja i odgovornosti Savjeta mogu biti detaljnije utvrđena FIFA-inim Pravilnikom o upravljanju.

C. Predsjednik

35 Predsjednik

1.

Predsjednik generično zastupa FIFA-u.

2.

Predsjednik će promovirati pozitivan imidž FIFA-e i obezbijediti da su misija, strateški smjer, politike i vrijednosti, kako je utvrdilo Savjet, zaštićeni i da se unapređuju.

3.

Predsjednik će se truditi da održava i razvija dobre odnose između FIFA-e, konfederacija, saveza članova, političkih tijela i međunarodnih organizacija.

4.

Predsjednik predsjedava Kongresom i sjednicama Savjeta. Predsjednik nema pravo glasa na Kongresu; on ima redovno pravo glasa u Savjetu.

5.

Sva ovlaštenja i odgovornosti Predsjednika mogu biti detaljnije utvrđene FIFA-inim Pravilnikom o upravljanju.

D. Generalni sekretarijat

36 Generalni sekretarijat

1.

Generalni sekretarijat obavlja svoje zadatke pod rukovodstvom generalnog sekretara, posebno u odnosu na sljedeće:

- Organizacija takmičenja i svih povezanih pitanja, u skladu s odlukama i nalogima Savjeta;
- Pregovori i izvršavanje svih komercijalnih ugovora, u skladu sa standardima, politikama i postupcima koje je utvrdilo Savjet;
- Administrativna podrška stalnim komisijama FIFA-e, posebno u odnosu na dodjeljivanje subvencija za fudbalski razvoj;
- Upravljanje aktivnostima i svakodnevnim poslovanjem FIFA-e, u skladu s parametrima koje je utvrdilo Savjet i u okviru budžeta koji je utvrdila Finansijska komisija; i
- Sva druga administrativna pitanja neophodna za efikasno poslovanje i organizaciju FIFA-e, kako je zatražilo i odobrilo Savjet.

2.

Savjet nadzire Generalni sekretarijat koji je odgovoran Savjetu, u vezi s obavljanjem njegovih funkcija.

3.

Ovlašćenja i odgovornosti generalnog sekretarijata mogu biti detaljnije utvrđene u FIFA-inom Pravilniku o upravljanju.

37 Generalni sekretar

1.

Generalni sekretar je glavni izvršni direktor FIFA-e.

2.

Generalnog sekretara imenuje i može razriješiti Savjet, u skladu s članom 34, stavom 9 ovog Statuta. Generalni sekretar odgovara Savjetu.

3.

Generalni sekretar treba da prođe provjeru ispunjavanja uslova koju obavlja za to nadležna komisija.

4.

Ovlašćenja i odgovornosti generalnog sekretara mogu biti detaljnije utvrđene u FIFA-inom Pravilniku o upravljanju.

E. Biro Savjeta

38 Biro Savjeta

1.

Između dviju sjednica Savjeta, Biro Savjeta rješava sva pitanja u nadležnosti Savjeta koja zahtijevaju trenutno donošenje odluka. Biro Savjeta sastavljen je od najviše sedam članova. Predsjednik FIFA-e i šest predsjednika konfederacija članovi su Biroa Savjeta po službenoj dužnosti.

2.

Predsjednik saziva sjednice Biroa Savjeta. Ako se sjednica ne može sazvati u odgovarajućem vremenskom razdoblju, odluke se mogu donositi putem drugih oblika komunikacije. Takve odluke stupaju na pravnu snagu odmah. Predsjednik odmah obavještava Savjet o odlukama Biroa Savjeta.

3.

Savjet potvrđuje sve odluke Biroa Savjeta na svojoj sljedećoj sjednici.

4.

Ako Predsjednik ne može prisustvovati sjednici, potpredsjednik Savjeta s najdužim stažem koji može prisustvovati zamjenjuje Predsjednika i djeluje kao predsjedavajući toj sjednici.

5.

Predsjednik ima pravo da odredi zamjenika bilo kojem članu koji ne može prisustvovati sjednici ili koji je u sukobu interesa. Zamjenik pripada Savjetu i istoj Konfederaciji kojoj pripada član koji nije u mogućnosti da prisustvuje ili je u sukobu interesa.

F. Stalne komisije

39 Stalne komisije

1.

Stalne komisije su:

- a) Komisija za upravljanje
- b) Finansijska komisija
- c) Komisija za razvoj
- d) Organizaciona komisija za takmičenja FIFA-e
- e) Komisija fudbalnih interesnih strana
- f) Komisija nacionalnih saveza
- g) Komisija za status igrača
- h) Komisija sudija
- i) Ljekarska komisija

2.

Stalne komisije odgovaraju Savjetu. One savjetuju i pomažu Savjetu u svojim relevantnim područjima djelovanja.

3.

Članovi stalnih komisija mogu istovremeno biti članovi Savjeta, uz izuzetak (i) članova Komisije za upravljanje, koji ne mogu pripadati Savjetu, (ii) nezavisnih članova Finansijske komisije u skladu s članom 41, stavom 2 ovog Statuta, i (iii) nezavisnih članova Komisije za razvoj u skladu s članom 42, stavom 1 ovog Statuta.

4.

Predsjedavajućeg, zamjenika predsjedavajućeg i članove svake stalne komisije imenuje Savjet na predlog saveza članova, predsjednika FIFA-e ili konfederacija, izuzev predsjedavajućeg, zamjenika predsjedavajućeg i članova Komisije za upravljanje, koje izabire Kongres na predlog Savjeta. Savjet obezbjeđuje odgovarajuću zastupljenost žena u stalnim komisijama. Njihovi mandati traju četiri godine, počevši od odnosnog datuma imenovanja od strane Savjeta. Članovi stalnih komisija mogu biti razriješeni svojih dužnosti u bilo koje vrijeme od strane Savjeta, izuzev članova Komisije za upravljanje, koje može razriješiti samo Kongres.

5.

Kandidati za stalne komisije moraju proći provjeru ispunjenja uslova koju sprovodi za to nadležna komisija. Kandidati za Komisiju za upravljanje moraju proći provjeru ispunjenja uslova koju sprovodi istražna komora Etičke komisije u skladu s FIFA-inim Pravilnikom o upravljanju.

6.

Sastav i struktura, uključujući kvalifikovanost i broj članova koji ispunjavaju kriterije nezavisnosti kao i specifične dužnosti i ovlašćenja pojedinih komisija utvrđuju se FIFA-inim Pravilnikom o upravljanju.

7.

Svaki predsjedavajući zastupa svoju komisiju i vodi poslovanje u skladu s FIFA-inim Pravilnikom o upravljanju.

8.

Savjet i svaka komisija, a ova zadnja uz odobrenje Savjeta, može, ukoliko je potrebno, osnovati biro i/ili potkomisiju za rješavanje hitnih pitanja.

9.

Svaka komisija može predložiti izmjene i dopune svojih pravilnika Komisiji za upravljanje i/ili Savjetu.
40 Komisija za upravljanje i Komisija za provjeru ispunjavanja uslova

1.

Komisija za upravljanje sastoji se od najmanje tri člana i najviše 12 članova koje bira Kongres. Najmanje polovina članova komisije, uključujući predsjedavajućeg i zamjenika predsjedavajućeg, treba da ispunjava kriterijume nezavisnosti kako je utvrđeno FIFA-inim Pravilnikom o upravljanju.

2.

Predsjedavajući, zamjenik predsjedavajućeg i jedan nezavisni član Komisije za upravljanje, koji ostaju članovi plenarne komisije, čine Komisiju za provjeru ispunjavanja uslova.

3.

Komisija za upravljanje rješava sva FIFA-ina pitanja u vezi upravljanja i po tom pitanju savjetuje i pomaže Savjetu.

4.

Komisija za provjeru ispunjavanja uslova obavlja takve provjere kandidata i aktuelnih članova tijela FIFA-e u skladu s ovim Statutom i FIFA-inim Pravilnikom o upravljanju.

5.

Komisija za provjeru ispunjavanja uslova obavlja nezavisne provjere u vezi kandidata i aktuelnih članova Komisije za reviziju i usklađenost i pravosudnih tijela kao i kandidata i aktuelnih članova stalnih komisija koji moraju ispunjavati kriterije nezavisnosti u skladu s FIFA-inim Pravilnikom o upravljanju, i provjerava izjave povezanih strana koje dostavljaju članovi Savjeta.

6.

Detalji o odgovornostima Komisije za upravljanje i Komisije za provjeru ispunjenja uslova utvrđene su FIFA-inim Pravilnikom o upravljanju.

41 Finansijska komisija

1.

Finansijska komisija sastoji se od najmanje tri i najviše 12 članova, od kojih svi moraju biti kvalifikovani za rješavanje finansijskih pitanja.

2.

Najmanje polovina članova komisije treba da ispunjava kriterijume nezavisnosti koji su utvrđeni u FIFA- inom Pravilniku o upravljanju.

3.

Finansijska komisija utvrđuje strategiju FIFA-e u vezi upravljanja finansijama i imovinom i savjetuje Savjet o tim pitanjima. Finansijska komisija priprema budžet FIFA-e koji se dostavlja Savjetu radi odobrenja, analizira račune i konsolidovane finansijske izvještaje i izdaje preporuke Savjetu o tome da li da se ista odobre. Komisija izrađuje nacrt politika, pravila i smjernica u vezi sveukupne strategije FIFA-e u pitanjima upravljanja finansijama i imovinom, koje dostavlja na odobrenje Savjetu.

4.

Detalji o odgovornostima Finansijske komisije utvrđeni su u FIFA-inom Pravilniku o upravljanju.

42 Komisija za razvoj

1.

Komisija za razvoj sastoji se od najmanje tri člana. Najmanje polovina članova komisije treba da ispunjava kriterije nezavisnosti, kako je utvrđeno u FIFA-inom Pravilniku o upravljanju.

2.

Komisija za razvoj bavi se pitanjima globalnih razvojnih programa FIFA-e. Ona savjetuje i predlaže odgovarajuće strategije, provjerava te strategije i s tim u vezi analizira podršku i programe saveza članova i konfederacija. Komisija za razvoj analizira glavne razvojne izazove, savjetuje i pomaže Savjetu o savezima članovima i razvojnim programima FIFA-e, predlaže nove razvojne aktivnosti i rješava pitanja vezana uz budžet, sastavlja smjernice i pravilnike o razvojnim programima, odobrava tematsku srž, vrste aktivnosti i dodjelu budžeta po kontinentu i/li savezu članu, i daje instrukcije administraciji o izvršenju odluka Komisije za razvoj. Komisija za razvoj može biti strukturisana u različitim potkomisijama zavisno od relevantnim područja ekspertize.

3.

Detalji o odgovornostima Komisije za razvoj utvrđeni su u FIFA-inom Pravilniku o upravljanju.

43 Organizaciona komisija za FIFA-ina takmičenja

Organizaciona komisija za FIFA-ina takmičenja organizuje sva službena FIFA-ina takmičenja u skladu s odredbama propozicija koje se primjenjuju na odnosna takmičenja, dokumentima u vezi

domaćinstava i zahtjevima u vezi domaćinstava koji su sadržani ili se na njih upućuje u propozicijama.

44 Komisija fudbalskih interesnih strana

Komisija fudbalskih interesnih strana bavi se fudbalskim pitanjima (uključujući ženski fudbal, futsal i fudbal na pijesku), posebno strukturom igre i odnosom između klubova, igrača, liga, saveza članova, konfederacija i FIFA-e, kao i pitanjima u vezi interesa klupskog fudbala širom svijeta, i takođe analizira osnovne aspekte fudbalskog treniranja i stručnog razvoja.

45 Komisija saveza članova

Komisija saveza članova bavi se odnosima između FIFA-e i njenih saveza članova, kao i postupanjem saveza članova u skladu sa Statutom FIFA-e. Komisija izrađuje predloge za optimalnu saradnju i takođe nadzire razvoj Statuta i pravilnika FIFA-e, konfederacija i saveza članova.

46 Komisija za status igrača

1.

Komisija za status igrača utvrđuje i nadzire usklađenost s Pravilnikom o statusu i transferima igrača i utvrđuje status igrača za različita FIFA-ina takmičenja. Njena nadležnost uređena je Pravilnikom o statusu i transferima igrača.

2.

Komisija je takođe odgovorna za rad Komore za rješavanje sporova u skladu s Pravilnikom o statusu i transferima igrača i Pravilnikom o postupcima Komisije za status igrača i Komore za rješavanje sporova.

47 Sudijska komisija

Sudijska komisija primjenjuje i tumači Pravila igre i može predlagati izmjene i dopune Pravila igre Savjetu. Ona imenuje sudije i pomoćne sudije za utakmice u takmičenjima koje organizuje FIFA.

48 Ljekarska komisija

Ljekarska komisija bavi se svim medicinskim aspektima fudbala, uključujući borbu protiv dopinga.

VI. GODIŠNJA KONFERENCIJA SAVEZA ČLANOVA

49 Godišnja konferencija saveza članova

FIFA najmanje jednom godišnje, o svom trošku, organizuje konferenciju saveza članova za predsjednike saveza članova i/ili njihove najviše rukovodioce, kako bi rješavali pitanja od visoke važnosti za fudbalski svijet, kao što su, na primjer, fudbalski razvoj, integritet, društvena odgovornost, upravljanje, ljudska prava, rasizam, namještanje utakmica, jednakost polova, zaštita čistih sportista i omladine i sigurnost.

VII. NEZAVISNE KOMISIJE

50 Institucionalna nezavisnost

Nezavisne komisije kao i njihovi pojedinačni članovi obavljaju svoje aktivnosti i dužnosti u potpunosti nezavisno, ali uvijek u interesu FIFA-e i u skladu sa Statutom i pravilnicima FIFA-e.

51 Komisija za reviziju i usklađenost

1.

Komisija za reviziju i usklađenost sastoji se od najmanje tri i najviše sedam članova, od kojih ni jedan ne smije pripadati bilo kojem drugom FIFA-inom tijelu. Članovi komisija da budu iskusni i da poznaju finansijska i/ili regulatorna i pravna pitanja i ne smiju biti uključeni u bilo kakve odluke koje utiču na poslove FIFA-e.

2.

Kandidati za bilo koju poziciju u Komisiji za reviziju i usklađenost kao i aktuelni članovi komisije treba da ispunjavaju kriterijume nezavisnosti, kako je utvrđeno FIFA-inim Pravilnikom o upravljanju.

3.

Predsjedavajućeg, zamjenika predsjedavajućeg i članove Komisije za reviziju i usklađenost bira Kongres. Njihov mandat traje četiri godine, počevši po završetku Kongresa koji ih je izabrao. Predsjedavajućeg, zamjenika predsjedavajućeg i druge članove Komisije za reviziju i usklađenost samo Kongres može razriješiti dužnosti.

4.

Predsjedavajući, zamjenik predsjedavajućeg i članovi Komisije za reviziju i usklađenost mogu biti izabrani na najviše tri mandata (bilo uzastopno ili ne).

5.

Ukoliko predsjedavajući, zamjenik predsjedavajućeg ili član Komisije za reviziju i usklađenost da ostavku ili postane trajno nesposoban za obavljanje svojih dužnosti tokom svog mandata, Savjet imenuje zamjenu do sljedećeg Kongresa, kada će Kongres izabrati zamjenu za preostali dio inicijalnog mandata.

6.

Komisija za reviziju i usklađenost odgovara Kongresu.

7.

Komisija za reviziju i usklađenost savjetuje, pomaže i nadgleda Savjet u nadzoru FIFA-inih finansijskih pitanja i pitanja usklađenosti i nadgleda usklađenost s FIFA-inim Pravilnikom o upravljanju. Ona nadgleda generalni sekretarijat.

8.

Komisija za reviziju i usklađenost obezbjeđuje potpunost i pouzdanost finansijskog računovodstva i pregleda finansijske izvještaje, konsolidovane finansijske izvještaje i izvještaje spoljnih revizora. Uz to, Komisija nadzire FIFA-ina finansijska pitanja i pitanja usklađenosti uključujući, konkretno, raspodjelu i tok sredstava koja se odnose na razvoj i daje predloge odgovarajućim tijelima FIFA-e za bilo kakve aktivnosti koje smatra potrebnima na osnovu takvog nadzora.

9.

Komisija osniva Potkomisiju za naknade, koja se sastoji od predsjedavajućeg Finansijske komisije, predsjedavajućeg Komisije za reviziju i usklađenost i trećeg člana kojeg zajednički imenuju dva predsjedavajuća. Ovaj treći član treba da ispunjava kriterijume nezavisnosti, kako je utvrđeno u FIFA-inom Pravilniku o upravljanju.

10.

Potkomisija za naknade posebno utvrđuje pravila u vezi naknada i utvrđuje naknade predsjednika, članova savjeta i generalnog sekretara FIFA-e. Podaci o pojedinačnim naknadama predsjednika, članova savjeta i generalnog sekretara FIFA-e biće javno dostupni.

11.

Detalji o odgovornostima Komisije za reviziju i usklađenost i Potkomisije za naknade, njihova interna saradnja i druga proceduralna pitanja utvrđeni su u FIFA-inom Pravilniku o upravljanju.

52 Pravna tijela

1.

Pravna tijela FIFA-e su:

- a) Disciplinska komisija;
- b) Etička komisija;
- c) Komisija za žalbe.

2.

Disciplinska komisija i Komisija za žalbe sastavljene su od predsjedavajućeg, zamjenika predsjedavajućeg i određenog broja drugih članova. Obje komore Etičke komisije sastoje se svaka od predsjedavajućeg, dva zamjenika predsjedavajućeg i određenog broja drugih članova. Sastav pravnih tijela treba da poštuje poštenu raspodjelu funkcija te je potrebno voditi računa o savezima članovima. Prilikom predlaganja predsjedavajućeg, zamjenika predsjedavajućeg i drugih članova pravnih tijela Kongresu, Savjet uzima u obzir odgovarajuću zastupljenost žena u pravnim tijelima.

3.

Pravna tijela da su sastavljena na način da članovi, zajedno, posjeduju znanje, sposobnosti i stručno iskustvo koje im je potrebno za propisno obavljanje njihovih zadataka. Predsjedavajući i zamjenici predsjedavajućeg pravnih tijela trebaju biti kvalifikovani pravnici.

4.

Predsjedavajući, zamjenici predsjedavajućeg i članovi Disciplinske komisije, obje komore Etičke komisije i Komisije za žalbe treba da ispunjavaju kriterije nezavisnosti kako je utvrđeno u FIFA- inom Pravilniku o upravljanju.

5.

Predsjedavajuće, zamjenike predsjedavajućeg i druge članove pravnih tijela bira Kongres i oni nijesu članovi niti jednog drugog tijela FIFA-e. Njihov mandat traje četiri godine, počevši od završetka Kongresa koji ih je izabrao. Samo Kongres može razriješiti dužnosti predsjedavajuće, zamjenike predsjedavajućeg i druge članove pravnih tijela.

6.

Predsjedavajući, zamjenici predsjedavajućeg i članovi pravnih tijela mogu biti na dužnosti po najviše tri mandata (bilo uzastopno ili ne).

7.

Ukoliko predsjedavajući, zamjenik predsjedavajućeg ili član pravnog tijela da ostavku ili postane trajno onesposobljen za obavljanje svojih dužnosti tokom svog mandata, Savjet imenuje zamjenu do sljedećeg Kongresa kada Kongres bira zamjenu za preostali dio inicijalnog mandata.

8.

Istražna komora Etičke komisije obavlja provjere ispunjavanja uslova u vezi kandidata i aktuelnih članova Komisije za upravljanje, u skladu s FIFA-inim Pravilnikom o upravljanju. Ona sprovodi provjere nezavisnosti kandidata i aktuelnih članova Komisije za upravljanje koji da ispunjavaju kriterijume nezavisnosti u skladu s FIFA-inim Pravilnikom o upravljanju.

9.

Nadležnosti donošenja odluka određenih komisija ostaju nepromijenjene.

53 Disciplinska komisija

1.

Funkcija Disciplinske komisije uređena je Disciplinskim kodeksom FIFA-e. Komisija donosi odluke samo ako je prisutno najmanje tri člana. U određenim slučajevima, predsjedavajući može odlučivati samostalno.

2.

Disciplinska komisija može savezima članovima, klubovima, službenim licima, igračima i posrednicima i licenciranim agentima za organizaciju utakmica izricati kazne opisane u ovom Statutu i Disciplinskom kodeksu FIFA-e.

3.

U odnosu na suspenzije i isključenje saveza članova ove odredbe su predmet disciplinske nadležnosti Kongresa i Savjeta.

4.

Savjet donosi Disciplinski kodeks FIFA-e.

5.

Disciplinska komisija može predlagati Savjetu izmjene i dopune svojih pravilnika.

54 Etička komisija

1.

Funkcija Etičke komisije uređena je Etičkim kodeksom FIFA-e. Ona je podijeljena u istražnu komoru i pravosudnu komoru. Pravosudna komora donosi odluke ukoliko je prisutno najmanje tri člana. Predsjedavajući može u posebnim slučajevima odlučivati samostalno.

2.

Etička komisija može službenim licima, igračima, posrednicima i licenciranim agentima za organizaciju utakmica izricati kazne opisane u ovom Statutu, Etičkom kodeksu FIFA-e i Disciplinskom kodeksu FIFA-e.

3.

Savjet donosi Etički kodeks FIFA-e.

4.

Etička komisija može predlagati Savjetu izmjene i dopune svojih pravilnika.

55 Komisija za žalbe

1.

Funkcija Komisije za žalbe uređena je Disciplinskim kodeksom FIFA-e i Etičkim kodeksom FIFA- e. Komisija donosi odluke samo ako su prisutna najmanje tri člana. U određenim slučajevima, predsjedavajući može odlučivati samostalno.

2.

Komisija za žalbe odgovorna je za razmatranje žalbe protiv odluka Disciplinske komisije i Etičke komisije koje shodno relevantnim pravilnicima FIFA-e nijesu konačne.

3.

Odluke Komisije za žalbe su neopozive i obvezujuće za sve odnosne strane. Ova odredba predmet je žalbi koje se podnose Sportskom arbitražnom sudu (CAS).

VIII. Disciplinske mjere

56 Disciplinske mjere

Disciplinske mjere su primarno:

1.

za fizička i pravna lica:

- a) opomena;
- b) ukor;
- c) novčana kazna;
- d) vraćanje nagrada.

2.

za fizička lica:

- a) opomena;
- b) isključenje;
- c) suspenzija za utakmice;
- d) zabrana pristupa svlačionicama i/ili klupi za rezervne igrače;
- e) zabrana ulaska na stadion;
- f) zabrana učestvovanja u fudbalskim aktivnostima;
- g) društveni rad.

3.

za pravna lica:

- a) zabrana transfera;
- b) igranje utakmice bez gledalaca;
- c) igranje utakmice na neutralnom terenu;
- d) zabrana igranja na određenom stadionu;
- e) poništenje rezultata utakmice;
- f) isključenje;
- g) utakmica izgubljena "bez borbe";
- h) oduzimanje bodova;
- i) spuštanje u nižu ligu;
- j) ponovno odigravanje utakmice.

IX. ARBITRAŽA

57 Sportski arbitražni sud (CAS)

1.

FIFA priznaje nezavisni Sportski arbitražni sud (CAS) sa sjedištem u Lausanni (Švajcarska), za rješavanje sporova između FIFA-e, saveza članova, konfederacija, liga, klubova, igrača, službenih lica, posrednika i licenciranih posrednika za ugovaranje utakmica.

2.

Odredbe Kodeksa sportske arbitraže CAS-a primjenjuju se na postupke. CAS prvenstveno primjenjuje različite pravilnike FIFA-e i, dodatno, švajcarsko pravo.

58 Nadležnost CAS-a

1.

Žalbe na konačne odluke pravnih tijela FIFA-e i odluke konfederacija, saveza članova ili liga podnose se CAS-u u roku od 21 dana od dana prijema obavještenja o odnosnoj odluci.

2.

Obraćanje CAS-u dozvoljeno je samo nakon što se iscrpe svi ostali interni kanali.

3.

Međutim, CAS neće razmatrati žalbe koje proizlaze iz:

- a) kršenja Pravila igre;
- b) suspenzija do četiri utakmice ili do tri mjeseca (uz izuzetak odluka u vezi dopinga);
- c) odluka protiv kojih se može podnijeti žalba nezavisnom i valjano konstituisanom arbitražnom sudu priznatom prema odredbama saveza ili konfederacije.

4.

Žalba nema obustavno dejstvo. Odgovarajuće tijelo FIFA-e, ili alternativno CAS, mogu naložiti da žalba ima obustavno dejstvo.

5.

FIFA ima pravo da uloži žalbu CAS-u na sve interne konačne i obavezujuće odluke u vezi dopinga koje su konkretno donijele konfederacije, savezi članovi ili lige shodno odredbama Antidoping pravilnika FIFA-e.

6.

Svjetska Antidoping agencija (WADA) ima pravo da uloži žalbu CAS-u protiv svake interne konačne i obavezujuće odluke u vezi dopinga koju je donijela FIFA, konfederacije, savezi članovi ili lige shodno odredbama Antidoping pravilnika FIFA-e.

59 Obaveze u vezi rješavanja sporova

1.

Konfederacije, savezi članovi i lige saglasni su da priznaju CAS kao nezavisno pravno tijelo i obavezuju se da će njihovi članovi, pridruženi igrači i službena lica poštovati odluke CAS-a. Ista obveza primjenjuje se na posrednike i licencirane posrednike za ugovaranje utakmica.

2.

Zabranjeno je obraćanje redovnim sudovima, osim ako to nije posebno utvrđeno pravilnicima FIFA-e. Obraćanje redovnim sudovima za sve vrste privremenih mjera takođe je zabranjeno.

3.

Savezi u svoje statute ili pravilnike treba da ugrade odredbu kojom se zabranjuje podnošenje sporova u savezu ili sporova koji se tiču liga, članova liga, klubova, članova klubova, igrača, službenih lica i drugih službenih osoba saveza, redovnim sudovima, osim ako pravilnici FIFA- e ili obvezujuće zakonske odredbe posebno predviđaju ili propisuju obraćanje redovnim sudovima. Umjesto obraćanja redovnim sudovima, potrebno je ugraditi odredbu o arbitraži. Takvi sporovi se pokreću pred nezavisnim i valjano sastavljenim arbitražnim sudom priznatim u skladu s odredbama saveza ili konfederacije ili CAS-a.

Savezi takođe osiguravaju sprovođenje ove odredbe u savezu, ako je potrebno uvođenjem takve obveze za svoje članove. Savezi izriču kazne svakoj strani koja propusti poštovanje ove obveze i osigura da se svaka žalba protiv takvih kazni jednako tako striktno dostavlja arbitraži, a ne redovnim sudovima.

X POŠTOVANJE ODLUKA FIFA-e

60. Primjena odluka

1.

Konfederacije, savezi članovi i lige saglasni su da će u potpunosti poštovati sve odluke nadležnih tijela FIFA-e koje su, prema ovom Statutu, konačne i ne podliježu žalbi.

2.

Oni će preduzimati sve potrebne mjere predostrožnosti kako bi osigurali da njihovi članovi, igrači i službena lica poštuju ove odluke.

3.

Ista obaveza primjenjuje se na posrednike i licencirane posrednike za ugovaranje utakmica.

61 Kazne

Svako kršenje prije navedenih odredbi kazniće se u skladu s Disciplinskim kodeksom FIFA-e.

XI. FINANSIJE

62 Finansijski period

1.

Finansijski period FIFA-e traje četiri godine i počinje 1. januara u godini koja slijedi nakon završnog takmičenja FIFA Svjetskog prvenstva.

2.

Prihodi i rashodi FIFA-e vode se na način da isti budu uravnoteženi u finansijskom razdoblju. Glavne buduće obveze FIFA-e garantuju se putem stvaranja rezervi.

3.

Generalni sekretar odgovoran je za sastavljanje godišnjih konsolidovanih izvještaja FIFA-e zajedno s njenim podružnicama na dan 31. decembra.

63 Revizori

Revizori revidiraju račune i godišnje finansijske izvještaje, uključujući konsolidovane finansijske izvještaje koje je odobrilo Savjet i svoje izvještaje podnose Kongresu, u skladu s primjenjivim švajcarskim građanskim zakonikom. Revizori se imenuju na razdoblje od tri godine. Njihov mandat može biti obnovljen.

64 Članarine

1.

Članarina dopijeva 1. januara svake godine. Godišnja članarina za nove saveze članove za odnosnu godinu plaća se u roku od 30 dana od završetka Kongresa na kojem su primljeni u članstvo.

2.

Kongres određuje iznos godišnje članarine svake četiri godine na preporuku Savjeta. Članarina je ista za sve saveze članove i ne može iznositi više od 1.000,00 USD.

65 Poravnanje

FIFA može teretiti račun svakog saveza člana kako bi namirila potraživanja.

66 Dažbine

1.

Konfederacije mogu zahtijevati dažbine za međunarodne utakmice odigrane između dviju „A” reprezentacija, u skladu sa statutima i pravilnicima konfederacija.

2.

Savezi članovi mogu zahtijevati svoje dažbine za utakmice odigrane na njihovoj teritoriji, nezavisno od njihove konfederacije, a u skladu sa statutom i pravilnicima saveza člana.

XII PRAVA U TAKMIČENJIMA I DOGAĐAJIMA

Prava u takmičenjima i događajima

1.

FIFA, njeni savezi članovi i konfederacije izvorni su vlasnici svih prava koja proizlaze iz takmičenja i drugih događanja pod njihovom nadležnošću, bez ikakvih ograničenja u odnosu na sadržaj, vrijeme, mjesto i zakon. Ta prava, između ostalog, uključuju sve vrste finansijskih prava, audiovizualne i radio snimke, prava reprodukcije i prava televizijskog prenosa, multimedijaska prava, marketinška i promotivna prava i sva nematerijalna prava kao što su grbovi i prava štampanja koja proizlaze iz zakona o pravu na štampanje.

2.

Savjet odlučuje o načinu i opsegu korišćenja ovih prava i sastavlja poseban pravilnik u tom smislu. Savjet samostalno odlučuje da li će se ta prava koristiti ekskluzivno ili zajednički s trećom stranom, ili u cijelosti putem treće strane.

68 Ovlašćenje za distribuciju

1.

FIFA, njeni savezi članovi i konfederacije ekskluzivno su odgovorni za davanje odobrenja za distribuciju slike i zvuka i drugih prenosnika podataka s fudbalskih utakmica i događaja pod njihovom nadležnošću, bez ikakvih ograničenja u odnosu na sadržaj, vrijeme, mjesto i tehničke i pravne aspekte.

2.

Savjet u tom smislu izdaje poseban pravilnik.

XIII. TAKMIČENJA

A. Završna takmičenja FIFA-e

69 Mjesto održavanja takmičenja

1.

Savjet odlučuje o mjestu održavanja završnih takmičenja koje organizuje FIFA, s isključivim izuzetkom u odnosu na mjesto završnog takmičenja FIFA Svjetskog prvenstva, o čemu odlučuje Kongres u skladu sa stavom 2 ovog člana.

2.

Odluka o mjestu održavanja završnog takmičenja FIFA Svjetskog prvenstva ima za cilj osiguranje postizanja najboljih mogućih uslova domaćinstva u zemlji domaćinu i poštovanje u nastavku opisanog postupka:

- a) Na osnovu posebnog pravilnika koji donosi Savjet, Generalni sekretarijat FIFA-e utvrđuje pošten i transparentan postupak kandidature, pozivajući sve kvalifikovane saveze članove da dostave kandidaturu i detaljno definišu uslove za kandidaturu i domaćinstvo, kao i kriterijume za izbor domaćina događanja.
- b) Na osnovu svoje najbolje procjene, i uzimajući u obzir kriterijume utvrđene za izbor domaćina, generalni sekretarijat FIFA-e podnosi Savjetu javno izvještaj s ocjenama usklađenosti svih kandidatura s postupkom kandidature i uslovima za domaćinstvo događaja.
- c) Savjet razmatra izvještaj i određuje, na osnovu svoje najbolje procjene i to otvorenim glasanjem, do tri kandidature koje se podnose Kongresu na konačno odlučivanje. Rezultat svakog glasanja biće javno objavljen.
- d) Kongres bira mjesto domaćinstva među kandidaturama koje je odredilo Savjet. U prvom krugu potrebna je apsolutna većina (više od 50%) prisutnih saveza članova s pravom glasa. Ukoliko u prvom krugu ne bude postignuta apsolutna većina, tada se eliminiše kandidatura koja je u prvom krugu dobila najmanji broj glasova. U drugom krugu, ili ukoliko Kongresu bude podneseno manje od tri kandidature, dovoljna je jednostavna većina (više od 50%) valjanih glasova.

3.

Kongres na istoj sjednici ne može dodijeliti prava domaćinstva za više od jednog FIFA Svjetskog prvenstva.

4.

Pravo domaćinstva takmičenja neće biti dodijeljeno članovima iste konfederacije za dva uzastopna FIFA Svjetska prvenstva.

B. Međunarodne utakmice i takmičenja

70. Međunarodni kalendar utakmica

Nakon što ga usaglasi s konfederacijama, Savjet sastavlja međunarodni kalendar utakmica koji je obvezujući za konfederacije, saveze članove i lige.

71 Međunarodne utakmice i takmičenja

1.

Savjet je odgovorno za izdavanje pravilnika za organizaciju međunarodnih utakmica i takmičenja između reprezentativnih ekipa i između ligaških, klupskih i/ili mješovitih ekipa. Ni jedna takva utakmica ili takmičenje ne može se odigrati bez prethodne saglasnosti FIFA-e, konfederacija i/ili saveza članova u skladu s Pravilnikom o međunarodnim utakmicama.

2.

Savjet može izdati dodatne odredbe za takve utakmice i takmičenja.

3.

Savjet utvrđuje sve kriterijume za odobravanje sastava ekipa koji nijesu obuhvaćeni Pravilnikom o međunarodnim utakmicama.

4.

Bez obzira na nadležnost odobravanja, kako je utvrđeno Pravilnikom o međunarodnim utakmicama, FIFA može donositi konačne odluke o odobrenju bilo koje međunarodne utakmice ili takmičenja.

72 Kontakti

1.

Bez odobrenja FIFA-e, igrači i ekipe saveza članova ili privremenih članova konfederacija ne mogu igrati utakmice ili stupati u sportske kontakte s igračima ili ekipama koje nijesu pridružene savezima članovima ili privremenim članovima konfederacija.

2.

Savezi članovi i njihovi klubovi ne mogu igrati na teritoriji drugog saveza člana bez njegovog prethodnog odobrenja.

73 Odobrenje

Savezi, lige ili klubovi koji su pridruženi savezu članu mogu se priključiti drugom savezu članu ili učestvovati u takmičenjima na teritoriju tog saveza člana samo u izuzetnim okolnostima. U svakom slučaju, odobrenje moraju dati oba saveza člana, odnosna(e) konfederacija(e) i FIFA.

XIV. ZAVRŠNE ODREDBE

74 Raspuštanje

Ako se FIFA raspusti, njena imovina se prosljeđuje vrhovnom sudu zemlje u kojoj se nalazi njeno sjedište. Sud zadržava ovu imovinu u vjeri "bonus pater familiae" do ponovnog uspostavljanja FIFA-e.

75 Prelazne odredbe

1.

Ovaj Statut usvojio je Vanredni Kongres u Zurichu 26. februara 2016. i stupa na snagu šezdeset (60) dana nakon završetka pomenutog Kongresa, i podliježe sljedećim odredbama:

2.

Šezdeset (60) dana nakon završetka Kongresa Izvršni odbor biće automatski transformisan u Savjet. Aktuelni članovi Izvršnog odbora toga datuma biće prvi članovi Savjeta; njihovi mandati u Savjetu isteći će po završetku njihovih odnosnih preostalih mandata u Izvršnom odboru. Kao posljedica toga, tokom prelaznog perioda koji će trajati sve dok cjelokupno Savjet ne bude izabrano od strane saveza članova prilikom kongresa odnosnih konfederacija, broj članova Savjeta će biti ispod broja koji je utvrđen članom 33, stavom 4 ovog Statuta.

3.

Vremenski rokovi utvrđeni članom 33 stavom 3, članom 51 stavom 4 i članom 52 stavom 6 ovog Statuta primjenjuju se samo na postojeće komisije od datuma završetka njihovih tekućih mandata.

4.

Članove Komisije za upravljanje izabraće Kongres u maju 2016. (Mexico City).

5.

Što se tiče stalnih komisija koje više neće postojati prema ovom Statutu, Savjet će utvrditi kada će one biti raspuštene. Što se tiče stalnih komisija koje će i nadalje postojati prema ovom Statutu, ali će biti izmijenjene, Savjet će utvrditi detalje tih tranzicija. Savjet će takođe utvrditi kada će novoosnovane stalne komisije preuzeti svoje aktivnosti. Članovi komisija koje nastavljaju sa svojim radom i/ili koje će biti izmijenjene, zaključiće svoje mandate na koje su već imenovani.

Cirih, 26. februara 2016.

Za FIFA-u

v.d. Predsjednika
Issa Hayatou

v.d. Generalnog sekretara
Markus Kattner

PRAVILNIK O PRIMJENI STATUTA

I. MOLBA ZA PRIJEM U ČLANSTVO FIFA-e

1 Molba za prijem

Savjet može propisati postupak prijema posebnim pravilnikom.

2 Konfederacije

1.

Na osnovu konačnog izvještaja konfederacije, Savjet odlučuje da li Savez ispunjava uslove za prijem u članstvo FIFA-e.

2.

Ako su uslovi ispunjeni, sljedeći Kongres odlučuje o tome da li će odnosni Savez biti primljen u članstvo ili ne.

II. AGENTI ZA UGOVARANJE UTAKMICA I POSREDNICI

3 Agenti za ugovaranje utakmica

1.

Za ugovaranje utakmica mogu se angažovati agenti za ugovaranje utakmica.

2.

Agenti koji su angažovani za organizovanje utakmica između ekipa iz iste konfederacije moraju biti službeno priznati od odnosne konfederacije (licencirani). Konfederacija izdaje odgovarajuća pravila.

3.

Agenti koji su angažovani za organizovanje utakmica između ekipa iz različitih konfederacija moraju imati licencu FIFA-e. Savjet izdaje odgovarajuća pravila.

4.

FIFA ima pravo da interveniše samo kako bi se poštovali ugovori zaključeni između agenata za ugovaranje utakmica i ekipa u sljedećim slučajevima:

- a) ako utakmica ili turnir koji su predmet spora uključuje ekipe iz različitih konfederacija;
- b) ako odnosni agent za ugovaranje utakmica ima licencu FIFA-e.

4 Posrednici

Igrači i klubovi imaju pravo da koriste usluge posrednika kada zaključuju ugovor o zapošljavanju i/ili ugovor o transferu. Savjet izdaje Pravilnik o radu s posrednicima.

III. PRAVO NASTUPA ZA REPREZENTATIVNE EKIPE

5 Načelo

1.

Svaka osoba koja ima stalno državljanstvo koje nije zavisno o prebivalištu u određenoj zemlji, ima pravo nastupa za reprezentativne ekipe saveza te zemlje.

2.

Uz izuzetak uslova navedenih u članu 8 u nastavku, svaki igrač koji je već učestvovao u utakmici (bilo u cijelosti ili djelimično) u službenom takmičenju bilo koje kategorije ili bilo koje vrste fudbala za jedan savez, ne može igrati međunarodnu utakmicu za reprezentativnu ekipu drugog saveza.

6 Državljanstvo koje igračima daje pravo da predstavljaju više od jednog Saveza

1.

Igrač koji prema odredbama člana 5 ima pravo da predstavlja više od jednog saveza po osnovu svog državljanstva, može igrati međunarodnu utakmicu za jedan od tih Saveza samo ukoliko, pored relevantnog državljanstva, on takođe ispunjava najmanje jedan od sljedećih uslova:

- a) Rođen je na teritoriju relevantnog saveza;
- b) Njegova je biološka majka ili biološki otac rođena/rođen na teritoriji relevantnog saveza;
- c) Njegova je baba ili đed rođena/rođen na teritoriju relevantnog saveza;
- d) Živio je neprekidno, najmanje dvije godine, na teritoriji relevantnog saveza.

2.

Bez obzira na stav 1 ovog člana, savezi koji dijele isto državljanstvo mogu zaključiti sporazum prema kojem se tačka (d) stav 1 ovog člana u potpunosti briše ili mijenja na način da određuje duže vremensko ograničenje. Takvi sporazumi se dostavljaju Savjetu koje ih odobrava.

7. Sticanje novog državljanstva

Svaki igrač koji se poziva na član 5 stava 1 da bi stekao novo državljanstvo, i koji nije igrao međunarodni fudbal u skladu s članom 5 stavom 2, ima pravo da igra za novu reprezentativnu ekipu samo ako ispunjava jedan od sljedećih uslova:

- a) Rođen je na teritoriji relevantnog Saveza;
- b) Njegova je biološka majka ili biološki otac rođena/rođen na teritoriju relevantnog saveza;
- c) Njegova je baba ili đed rođena/rođen na teritoriji relevantnog saveza;
- d) Nakon navršene 18. godine živio je neprekidno, najmanje pet godina, na teritoriji relevantnog saveza.

8 Promjena saveza

1.

Ako igrač ima više od jednog državljanstva, ili ako igrač stekne novo državljanstvo, ili ako igrač ima pravo nastupa za nekoliko reprezentativnih ekipa na račun svog državljanstva, on može, samo jednom, zahtijevati promjenu saveza za koji ima pravo da igra međunarodne utakmice na savez druge zemlje čije ima državljanstvo, a što je predmet sljedećih uslova:

- a) Nije igrao utakmicu (bilo u cijelosti ili djelimično) u službenom takmičenju na „A“ međunarodnom nivou za svoj sadašnji savez i već je imao državljanstvo reprezentativne ekipe za koju želi da igra u vrijeme svog prvog cjelokupnog ili djelimičnog nastupa na međunarodnoj utakmici u službenom takmičenju za svoj sadašnji savez.
- b) Nije mu dozvoljeno da igra za svoj novi savez u bilo kojem takmičenju u kojem je već igrao za svoj raniji savez.

2.

Ukoliko igrač kojeg je njegov Savez uveo u igru na međunarodnoj utakmici shodno članu 5 stavu 2 izgubi državljanstvo te zemlje po stalnoj osnovi, bez svog pristanka ili protiv svoje volje, a zbog odluke vladinih tijela, on može zahtijevati dozvolu da igra za drugi savez čije državljanstvo već ima ili ga je stekao.

3.

Svaki igrač koji ima pravo da promijeni saveze shodno stavu 1 i 2 ovog člana podnosi pisani, obrazloženi zahtjev generalnom sekretarijatu FIFA-e. Komisija za status igrača donosi odluku o zahtjevu. Postupak će biti u skladu s Pravilnikom o postupcima Komisije za status igrača i Komore za rješavanje sporova. Kada igrač podnese svoj zahtjev, on više nema pravo nastupa ni za jednu reprezentativnu ekipu dok njegov zahtjev ne bude obrađen.

IV. SPORTSKI INTEGRITET

9 Načelo prelaska u viši stepen takmičenja i spuštanja u niži stepen takmičenja

1.

Pravo kluba da učestvuje u domaćem ligaškom prvenstvu načelno zavisi o sportskoj zasluži. Na kraju takmičarske godine, klub se kvalifikuje za domaće ligaško prvenstvo ili ostankom u određenom stepenu takmičenja, ili prelaskom u viši stepen takmičenja, ili spuštanjem u niži stepen takmičenja.

2.

Pored kvalifikovanja po sportskoj zasluži, učestvovanje kluba u domaćem ligaškom prvenstvu može podlijegati drugim kriterijumima u okviru postupka licenciranja, pri čemu je naglasak na sportskim, infrastrukturnim, administrativnim, pravnim i finansijskim okolnostima. Mora postojati mogućnost ispitivanja odluka o licencama od strane žalbenog tijela saveza člana.

3.

Zabranjeno je mijenjanje pravne forme ili strukture kompanije kluba da bi mu se omogućila kvalifikacija po sportskoj zasluži i/ili da dobije licencu za domaće ligaško prvenstvo na štetu integriteta sportskog takmičenja. Ovo, na primjer, uključuje promjenu sjedišta, promjenu naziva ili prenos dioničkih vlasništva između različitih klubova. Mora postojati mogućnost ispitivanja odluka o zabranama od strane žalbenog tijela saveza člana.

4.

Svaki savez član odgovoran je za odlučivanje o nacionalnim pitanjima, koja se ne mogu delegirati na lige. Svaka konfederacija odgovorna je za odlučivanje o pitanjima koja uključuju više od jednog saveza s njene teritorije. FIFA je odgovorna za odlučivanje o međunarodnim pitanjima koja uključuju više od jedne konfederacije.

V. PRAVILA IGRE

10 Izmjene i dopune Pravila igre

1.

FIFA obavještava svoje saveze članove o svim izmjenama i dopunama kao i o odlukama u vezi Pravila igre u roku od mjesec dana od redovne godišnje sjednice IFAB-a.

2.

Savezi članovi sprovode ove izmjene i dopune kao i odluke najkasnije 1. jula nakon godišnje sjednice IFAB-a. Izuzeci se mogu dozvoliti samo savezima članovima čija takmičarska godina nije završena do tog datuma.

3.

Savezi članovi takve izmjene i dopune i odluke mogu sprovoditi odmah nakon što ih IFAB objavi.

VI. SUDIJE I POMOĆNE SUDIJE

11 Imenovanje

1.

Svaki sudija i pomoćni sudija imenovan za međunarodnu utakmicu pripada neutralnom savezu članu, osim ako su se odnosni savezi članovi prethodno drugačije dogovorili.

2.

Sudija i pomoćne sudije izabrani za suđenje međunarodne utakmice nalaze se na FIFA-inoj Listi međunarodnih sudija i pomoćnih sudija.

12 Izvještaj

1.

Sudija svake međunarodne "A" utakmice dostavlja izvještaj FIFA-i i savezu članu na čijoj teritoriji je utakmica odigrana u roku od 48 sati nakon završetka utakmice.

2.

Ovaj izvještaj se sastavlja na službenom obrascu koji sudija dobija od saveza člana pod čijom je nadležnošću utakmica odigrana.

3.

Izvještaj sadrži sve izrečene disciplinske mjere i razloge zbog kojih su izrečene.

13 Naknada

1.

Sudije i pomoćne sudije međunarodnih utakmica imaju pravo na:

- a) dnevnicu;
- b) naknadu putnih troškova.

Pravilnik FIFA-e o troškovima određuje iznose, kategoriju putovanja i broj dana za koje sudije i pomoćne sudije imaju pravo na naknadu.

2.

Savez član koji organizuje utakmicu na dan utakmice isplaćuje sudiji i pomoćnim sudijama iznos koji im pripada, u lako konvertibilnoj valuti.

3.

Troškove hotela i ishrane sudija i pomoćnih sudija međunarodnih utakmica pokriva savez član koji organizuje utakmicu.

VII. ZAVRŠNE ODREDBE

14 Ciljevi

1.

FIFA će ostvarenje svojih ciljeva obezbijediti isključivo korišćenjem pogodnih materijalnih i ljudskih resursa, ili sopstvenih, ili delegiranjem na saveze članove ili konfederacije, ili u saradnji s konfederacijama, a shodno Statutu FIFA-e.

2.

U odnosu na član 2 (g) Statuta FIFA-e, FIFA će naročito, ali ne ekskluzivno, preduzeti mjere protiv nedozvoljenog klađenja, dopinga i rasizma. Ove aktivnosti su zabranjene i podložne kaznama.

15 Stupanje na snagu

Pravilnik o primjeni Statuta usvojio je Vanredni kongres u Zurichu 26. februara 2016. i stupa na snagu odmah nakon usvajanja.

Cirih, 26. februara 2016.
Za FIFA-u

v.d. Predsjednika
Issa Hayatou

v.d. Generalnog sekretara
Markus Kattner

STALNE ODREDBE KONGRESA

1 Učestvovanje na Kongresu

1.

Svaki nacionalni savez na Kongresu mogu predstavljati najviše tri delegata, pri čemu sva trojica mogu učestvovati u raspravama.

2.

Imena delegata, uključujući onog s pravom glasa, dostavljaju se generalnom sekretarijatu prije početka Kongresa. Generalni sekretarijat upisuje pomenute delegate u spisak (s brojevima od 1 do 3). Delegat s pravom glasa upisuje se kao delegat pod brojem 1. Ako delegat s pravom glasa napusti Kongres tokom rasprava, delegat upisan pod brojem 2 na listi delegacije saveza člana ima pravo glasa. Ako nije prisutan ni ovaj delegat, pravo glasa ima delegat upisan pod brojem 3.

3.

FIFA podmiruje troškove putovanja i smještaja za tri delegata svakog saveza člana koji učestvuje na Kongresu. Savjet izdaje odgovarajuće uputstvo u tom smislu.

2 Predsjedavanje

1.

Predsjednik predsjedava Kongresom. U slučaju da Predsjednik nije u mogućnosti da prisustvuje, zamjenjuje ga potpredsjednik s najdužim stažem. Ako nije prisutan ni jedan potpredsjednik, Kongres za predsjedavajućeg bira jednog od članova Savjeta.

2.

Predsjedavajući osigurava da tok Kongresa bude strogo u skladu s ovim stalnim odredbama, otvara i zatvara Kongres, otvara i zaključuje rasprave i, osim ako Kongres odluči drugačije, daje riječ delegatima i vodi sve rasprave.

3.

Predsjedavajući je odgovoran za održavanje reda tokom rasprava. Protiv bilo kojeg učesnika Kongresa koji ometa tok rasprave može izreći sljedeće mjere:

- a) poziv na uspostavljanje reda;
- b) ukor;
- c) isključenje s jedne ili više sjednica.

4.

U slučaju žalbe uložene na takvu mjeru, Kongres odlučuje odmah, bez rasprave.

3 Brojači glasova

Na početku prve sjednice Kongres imenuje odgovarajući broj brojača glasova koji prebrojavaju glasove i pomažu Generalnom sekretaru u dijeljenju i brojanju glasačkih listića koji se izdaju u svrhu izbora. Savjet može odlučiti da se koristi elektronska oprema za određivanje rezultata glasanja.

4 Prevodioci

Službeni prevodioci se imenuju za prevođenje na službene jezike Kongresa. Imenuje ih Generalni sekretar.

5 Rasprave

1.

Raspravama o svakoj tački dnevnog reda prethodi kratak izvještaj:

- a) predsjedavajućeg ili člana Savjeta imenovanog u tu svrhu;
- b) predstavnika komisije kojeg Savjet imenuje za podnošenje izvještaja;
- c) delegata iz saveza člana koji je zahtijevao da tačka bude uvrštena na dnevni red.

2.

Predsjedavajući zatim otvara raspravu.

6 Govornici

1.

Riječ se daje po redosljedu prijave. Ni jedan govornik ne može početi da govori prije nego za to dobije odobrenje. Govornici govore s govornice postavljene u tu svrhu.

2.

Govornik ne može govoriti po drugi put o istoj tački dnevnog reda dok ne dobiju riječ svi ostali delegati koji su zatražili riječ.

7 Predlozi

1.

Svi predlozi dostavljaju se u pisanom obliku. Predlozi koji nijesu relevantni za predmet o kojem se raspravlja neće biti prihvaćeni za raspravu.

2.

Svaka izmjena i dopuna sastavlja se u pisanom obliku i predaje se predsjedavajućem prije stavljanja na raspravu.

8 Proceduralni predlozi i zaključenje rasprava

1.

Ako se daje proceduralni predlog, rasprava o glavnom pitanju se obustavlja sve dok se ne obavi glasanje o predlogu.

2.

Ako se predloži završetak rasprave, predlog se odmah stavlja na glasanje, bez rasprave. Ako se predlog odobri, riječ se daje samo onim savezima članovima koji su to zatražili prije nego je obavljeno glasanje.

3.

Predsjedavajući zaključuje raspravu osim ako Kongres jednostavnom većinom (više od 50%) važećih glasova odluči drugačije.

9 Glasanje

1.

Zabranjeno je tajno glasanje.

2.

Prije svakog glasanja, predsjedavajući, ili osoba koju on odredi, naglas čita tekst predloga i Kongresu objašnjava postupak glasanja (kvorum). U slučaju prigovora Kongres odmah donosi odluku.

3.

Glasanje se može obaviti prozivanjem, pod uslovom da to podrži najmanje 15 prisutnih saveza članova s pravom glasa.

4.

Niko ne može biti prisiljen da glasa.

5.

Po pravilu, glasanje se obavlja dizanjem ruku (glasačkih kartona), ili korišćenjem elektronske opreme.

6.

Predlozi se stavljaju na glasanje prema redosljedu kojim su dostavljeni. Ako ima više od dva glavna predloga, stavljaju se na glasanje jedan za drugim, a delegati ne mogu glasati za više od jednog predloga.

7.

Izmjene amandmana stavljaju se na glasanje prije amandmana, a amandmani prije glavnih predloga.

8.

Predlozi bez glasa protiv smatraju se usvojenima.

9.

Predsjedavajući provjerava rezultate glasanja i objavljuje ih Kongresu. Niko ne može dobiti riječ tokom glasanja, pa sve do objave rezultata.

10 Izbori

1.

Izbori se sprovode tajnim glasanjem i to putem glasačkih listića ili korišćenjem telefonskog glasanja, elektronskih brojača glasova koji garantuje tajnost izbora. Izbori za Predsjednika neće se sprovoditi telefonskim glasanjem. Raspored i prebrojavanje glasačkih listića, ili raspored i ocjenu telefonskog glasanja obavlja Generalni sekretar kojem pomažu imenovani brojači glasova.

2.

Prije prebrojavanja predsjedavajući objavljuje broj glasačkih listića koji su podijeljeni.

3.

Ako je broj vraćenih glasačkih listića jednak ili manji od broja podijeljenih glasačkih listića, izbori se proglašavaju valjanima. Ako je broj vraćenih listića veći, glasanje se proglašava nevažećim i nevaljanim, i se odmah se sprovodi novo glasanje.

4.

Predsjedavajući objavljuje rezultat svakog kruga glasanja.

5.

Generalni sekretar prikupljene i izbrojane glasačke listiće stavlja u kovertu namijenjenu u tu svrhu i odmah ih pečati. Generalni sekretarijat čuva ove kovertu i uništava ih 100 dana po završetku Kongresa.

11 Izračunavanje većine

1.

Jednostavna većina (više od 50%) izračunava se za izbore, glasanje i druge odluke na osnovu broja prikupljenih valjanih glasačkih listića ili broja elektronski prikupljenih valjanih glasova. Prazni glasački listići, nevažeći glasovi ili na drugi način izmanipulisani elektronski glasovi kao i uzdržavanje od glasanja bitće pri izračunavanju jednostavne većine zanemareni.

2.

Apsolutna većina (više od 50%) izračunava se na osnovu broja saveza članova koji su prisutni i imaju pravo glasa.

3.

Ukoliko tokom izbora jedan savez član da dva ili više glasova u korist jednog kandidata na istom glasačkom listiću ili putem elektronskog uređaja za glasanje u jednom izbornom krugu, ili tokom izbora jedan savez član da dva ili više glasova po istom pitanju, samo će se posljednji glas smatrati valjanim i biti brojan.

12 Stupanje na snagu

Ove Stalne odredbe Kongresa usvojio je Vanredni kongres u Cirihu 26. februara 2016. i stupaju na snagu odmah nakon usvajanja.

Cirih, 26. februara 2016.

Za FIFA-u

v.d. Predsjednika
Issa Hayatou

v.d. Generalnog sekretara
Markus Kattner